

婁縣續志卷五

水利志下

乾隆五十五年華亭知縣程明懷婁縣知縣甯貴上海知縣周雲翮青浦縣知縣蔣勵宣濬滙塘華亭又濬春申塘盤龍塘青浦又濬附近之盤龍小涑河

嘉慶二年華亭知縣王勸婁縣知縣張昌運會濬東北西城濠上海知縣湯燾濬薛家浜肇家浜及一切支河六年署松江府知府康基田濬華亭婁縣上海青浦聯界之泗涇蒲滙塘又濬府城內外市河

十五年華亭知縣李紹洛婁縣知縣蘇獻琛青浦知縣李廷芊會勘詳濬浦滙塘

婁縣續志

卷五

水利

一

十九年挑濬七寶鎮南市梢東接橫瀝西達小涑南通竹岡諸河

道光十六年江蘇巡撫林則徐驗收蘇松太等處河道挑濬會同兩江總督陶澍奏疏稿

奏爲蘇松太三州陸續挑辦各河道均已告成驗收如式恭摺奏祈

聖鑒事切維江蘇漕賦出自水田水治則田資其利不治則田被其害仰荷

諭旨飭修近年以來水利農田頗收實效如四十年秋間之發蛟十五年夏間之亢旱幸賴吳淞劉河白茆等處挑濬寬深蓄洩得力故皆不致成災此尤效之

顯著者是以官紳士庶倍知加意講求臣於上年驗收太倉之楊林河吳江之瓜涇港兩處將劉河案內節省餘銀量爲分撥仍令自行湊辦外其餘概由官民籌捐辦理當經彙同督臣陶澍奏蒙

諭旨允行在案自上年至今各屬續挑河道除零星汊港不計外其在蘇州府屬則吳縣之瓜涇港王家漚姚家莊七里港村前嘴大港新港各河統共工長一千五百六十七丈常熟昭文兩縣之福山塘河下通海口工長四千九百八十八丈零其附近之竺塘涇景市橋河共長三千四百丈並添建攔潮石閘一座又吳縣之張家塘香山港王家橋河共工長二千二

百三十六丈其在松江府屬則上海縣之蒲匯塘肇家浜兩河共長八千五百七十五丈又李從涇新涇薛家浜三河共長四千八百六十一丈各河挑竣之後於接連黃浦之龍華日赤二港各留大壩一座以截渾潮又修復南門外石閘以時啟閉並將該縣城河一體疏通又川沙廳之白蓮涇長浜呂家浜小腰浜四河與上海南匯並界共長六千五百二十四丈零又華亭縣之亭林鎮鶴頸漚大小運港共長三千餘丈又婁縣之古浦塘官紹塘等河共長三千六百六十六丈又金山縣先挑珠涇鎮互迎浜周家埭邵家塘等河共長五十里續挑腰涇河干巷鎮陸巷港

歸涇河老鴨涇朱泥涇各河共長四十五里又青浦縣泖河切灘與元和婁縣並界共長二千九百六十五丈零其在太倉州屬則太鎮兩境之楊林河共長四千九百四十七丈又州境之錢涇瑤塘又鎮洋縣境之朱涇南北澮漕石婆莆塘西南十八港六窰塘大凌門等河共長二萬四百九丈零又嘉定縣先挑之華亭涇蒲華塘黃姑塘共長六千七百四十九丈續挑之南北雙塘吉涇心涇川路涇橫塘練祈塘等河內外城濠共長九千四百六十九丈以上各工界連十五廳州縣合計挑竣土方一百六十六萬七千四百餘方茲已陸續據報挑竣臣於驗收海塘工程

之便凡可以經由處所俱經親歷該河量驗口底寬深現存水勢逐竿測量按段標記其未能經由之處遞委司府分註驗收均稟覆寬深如式其中尤以上海浦滙塘等五河常昭之福山塘河川沙之白蓮涇等四河太鎮之楊林各河挑挖倍見深通水勢極形暢順臣舟輿所歷親見遍地禾棉皆已長發望彌青葱耨鋤襪襪之民皞皞熙熙共冀歲登大有較前此數年景象迥乎不侔胥由

聖澤之淵涵下普斯民之樂利

臣

職司疆土感懍彌深

除借款之瓜涇港楊林河應飭按例造冊報銷外其餘捐辦之工自行遵照歷奉

諭旨免其造報至楊林河工長幾及五千丈估至十七萬餘方前經酌借銀八千兩不敷尙多概係勸捐湊辦應與瓜涇港不敷之項准其核實開明此外各工多由地方官首先捐廉爲之倡導紳庶人等或量力捐輸或業食佃力均賴衆擎易舉適觀厥成所有大小各捐戶已分飭查收確數由司核明按照定例分別詳請

奏咨至倡捐勸導暨在工出力之印委各員固屬分所應盡惟工段長而經費鉅其中設法籌辦若非殫心竭力亦恐未易集事如蒙

皇上天恩念其著有微勞

婁縣續志

卷五

水利

四

准予獎勵臣當與督臣陶澍擇其尤爲出力者另行會摺奏懇

恩施不敢稍任冒濫除驗收現濬河道丈尺彙開清單恭呈

御覽外所有驗收挑工緣由謹會同督臣陶澍合詞恭摺具

奏伏乞

皇上聖鑒謹

奏

道光十六年五月開濬蒲漚塘

華婁青紳士請留蒲漚塘壩其詞曰且稟華婁青職

舉生監駱芬何朝紳馬逢伯楊國瑞唐嘉賓劉錫棠
爲環求留壩並懇立碑以杜旁議而垂永久事切蒲
漚塘向例五年一濬旋開旋塞其故皆由挑濬以後
卽將塘口攔潮大壩開去渾水內灌日積泥沙不一
二年仍如平陸今蒙

大憲大人念切民瘼興修水利

奏請開挑派委上邑黃廉總理其事並將華婁清河段
勸令上海紳富一力捐挑更蒙上廉日逐查工不辭
勞瘁所舉董事亦屬勤能得以全河一律深通較之
歷屆工程殊爲暢達此皆

大憲大人委任得宜俾我子民不勞不費獲利靡窮

婁縣續志

卷五

水利

五

愛戴愚忱惟有額手臚歡望光頂頌竊查塘口大壩
現未開啟芬等前經匍赴上邑衙門環請求詳在案
猶恐大壩存留之後或有好事之徒以爲洩水難通
行舟有礙之處瀆陳

憲聽蓋蒲漚塘久已淤如平陸如必藉以分洩則未
開以前水從何洩此其無礙一也南有黃浦可洩西
南諸水北有吳淞江可洩西北諸水此其無礙二也
而其間有疏八十餘年壅塞之肇嘉浜又復疏新涇
及李從涇等河相爲流通則蒲漚西來之水仍可由
肇浜等迤東而達黃浦此其無礙三也至往來舟楫
凡洩水可通之處卽行舟可達之區其爲無礙更不

待言總之前次興挑不敢議及留壩者誠以肇浜諸河未浚未便率請今肇浜等河均各通深水有去路此壩一留則通塞皆宜輿情悉洽無五年一濬之勞有百年永久之賴是誠因時制宜地方盡善之舉爲亟環求大憲大人俯准下情恩賜飭縣立碑永杜旁議利垂久遠萬民銜感

上呈

道光十六年五月二十五日奉

欽命兵部侍郎都察院右副都御史江蘇巡撫部院加三級林批示此次挑濬蒲漚塘肇浜新涇李從涇等

婁縣續志

卷五

水利

六

河本部院親臨閱視逐段驗量均已一律深通華婁上青四邑咸資利賴黃令倡捐籌辦各紳董皆能踴躍從事經理得宜深堪嘉尚茲據該四邑紳董僉名具稟以該河前此旋挑旋淤之故皆因挑工甫竣卽將塘口攔潮大壩開去渾水內灌致積泥沙不一二年仍如平陸此次大壩未啟環請留壩立案等情查龍華江通達浦江其潮汐灌入河內最易淤墊雖各河未有五年一濬之例而道光八年酌挑之後連遭荒歉未克興工總因經費浩繁集資大爲不易此次大加開浚倍見深通若復潮汐往來不久仍然淤廢實堪深惜據請永留攔潮大壩係爲因地制宜有利

無害之計且蒲肇新李四河互相貫注以達吳淞卽由吳淞注浦達海西來之水不至壅遏而更可并力以助吳淞卽行舟稍有繞越亦甚不遠權其利害輕重自應俯如所請將龍華港大壩常留不放以絕渾潮此外隔境民人或有異議應由各地方官剴切開導俾無偏執仰蘇松太道卽速轉飭上海縣立案遵辦務垂永久以重水利而順輿情仍將辦理緣由通詳查考毋忽

道光二十六年松江府知府練廷璜偕紳士葉珪等築呂岡涇壩勒碑隄上

碑文見上卷

咸豐七年婁青兩邑合濬蒲匯塘南橫瀝南小涑各支

婁縣續志

卷五

水利

七

河 案卷無存不能悉叙

同治四年挑濬城西市河東自諸行西至慶雲橋其丈尺土方用錢經董不能逐行報明挑挖淺率旋濬旋淤

同治九年松江府知府楊永杰稟請開濬松郡各幹河其稟詞曰竊維備旱潦者莫如水利而備水利者莫如疏濬疏濬之法今昔異時高下異勢緩急異宜泥古而不通於今泥今而不師乎古皆不可以言水利蘇松西北自宜興荆溪入西南自湖州苕霅二溪分流七十二漕港以入由港匯於湖涇長橋北至於龐山過瓜涇又東北至於大小斜港入吳淞江東注於

海是吳淞乃太湖之正脉洩水之中條也吳淞之北是爲婁江其源來自西北匯湖水過蘇州婁門經崑山歷太倉東漸於海卽今劉河也吳淞之南爲黃浦江古之春申浦也其源則半由湖溇半由浙之嘉善出大蒸塘滙潦涇至浦東折而北過滬瀆合吳淞入於海是爲吳淞口也此吳中之三江也海忠介所謂吳淞開則江南之蘇松常浙之杭嘉湖同其利塞則同其害則吳淞之通塞誠江浙之最大關鍵也明夏忠靖公用元人周文英之議因吳淞而事劉河首開崑山夏界浦掣吳淞北達劉河挑嘉定之顧浦引吳淞貫吳塘至劉河入海又濬常熟白茅塘引太湖諸水入場子江是使蘇松之地血脉貫通分注於海爲功甚鉅今則吳淞西口及來源之長橋瓜涇大小斜港與夫婁江經流之蘇州婁門致和塘並崑新城河均節節淺阻清流不暢潮沙無以宣滌以致邇年松江腹內支幹各河旋濬旋淤有由來矣卽使劉河白茅深暢亦止能洩震澤半面之流而淞自爲淞婁自爲婁無以會全局之勢也方今

聖天子眷念東南

諭令江浙開濬湖漚浙已動工蘇省亦當同時併舉而大人又躬親履勘擘畫周詳此千載一時之事從此水旱有備凡在吏民莫不額手稱快惟是江浙之湖

漚旣開而吳江之長橋氾涇龐湖不能不開耳長橋
氾涇龐湖一開其源其流勢必浩瀚且大而蘇松入
海之三江又以吳淞爲最吳淞急而婁江黃浦亦急
非急婁黃也婁江一脉在蘇州者則盤葑婁諸門在
崑山者則城河及致和塘之首尾也黃浦一脉西北
之來者乃吳淞之支流卽華婁上青四縣境內西南
北三面源流之大幹也而其中由崑山出三江口過
吳淞南折而東至青浦境者爲趙屯浦又自青浦南
門歷柘澤塘經鍾界山東南至於松江西門外之秀
野橋爲沈涇塘又由泖湖東口直入西門外市河爲
古浦塘再由市河南折而爲西漉入黃浦此皆以之

行吳淞之水而實長橋氾涇龐湖之歸路也今歸路
淤塞而沈涇古浦尤甚潮至猶可潮去幾成平陸其
何以通血脉而使西來之清流得接松江支幹乎故
前年夏雨一多則浦湖之水逆行田間泛濫爲患蘇
松各邑民間自爲圩岸高厚者猶可苟倖一時之利
低薄者終不免決溢之患甚至高厚者亦復決溢此
豈水之性也哉其勢然也揆今日之勢立遠大之謀
自應將湖漚氾涇長橋龐河大小斜港吳淞西口及
吳淞婁江之淺窄者先行委員分途履勘視今昔之
河形酌緩急之時宜寬深確估而以出土約離岸十
丈之外分別難易造具清冊由憲臺核定詳奏次第

興辦如經費浩大蘇省獨力難支理當協謀於浙而浙亦義無容辭通力合作認真開濬普利樂之庶蘇松收其效乎至於青浦之趙屯浦青婁兩邑境內之沈涇塘並婁邑之古浦塘亟應分飭各該縣乘此東作未興之際傳集紳董及時議濬有業食佃力舊章可循者卽照章辦理如河身寬大承濬圖分不多則民力自必不逮仍應酌量接濟分別借款應還者或隨忙或隨漕卽由縣按得沾水利之圖分攤歸補不准藉延並嚴定處分以杜其侵挪之弊他如次要河港容當查明飭縣酌量農時次第疏濬所有蘇崑城河應請飭縣趕緊籌辦並請札飭崑新太嘉各州縣

查明婁江支幹是否深通探實稟辦如此則吳中之水脈絡相通入海必速度幾旱有所資澇有所洩而農事舟楫皆得利賴矣若夫薛澱三泖當爲蘇松蓄水之區故言水利者不及澱泖若疏濬澱泖使太湖之水逕趨黃浦而不取正道於吳淞在江震嘉湖未始不受洩通之益不知黃浦潮勢奔激洩水爲速吳淞潮勢平緩洩水較遲速則無滯遲則多淤此所以黃浦日濶吳淞日湮而已見於今日者也倘再使太湖諸水由泖澱而暢達於浦則速者愈速而遲者愈遲西來清水洩其半於劉河白茅又洩其半於澱泖黃浦不數年而吳淞中幹轉成錮疾矣自此清水絕

流惟恃潮汐前人謂一潮之淀厚及一箸一日兩潮厚及一錢歲三百六十錢二尺餘矣日積月累吳淞故道不復可問矣而沿吳淞南北沃壤更可知而知矣由此觀之澱泖可緩而吳淞之源流爲最急也泖澱之濱民環而居種茭植蘆侵佔爲田築圩岸以圍之鬪河泥以培之雖成膏腴究與潮水相爭間有水高於田者湖泖之淤墊蓋爲此也應請俟湖漚吳淞各工蒞事之後再行察看情形擇其有碍水利者押令剷除其圍則其田不去而自去再用機器擇其澇淺亦可宣洩矣至於各處攔河之魚籬誠阻塞河流之大害應請嚴行通飭各屬一律押拆不准抗違將

以益之不能無損然而所損者小所益者大也

同治九年重濬蒲滙塘東出申浦西接泗涇以達於泖計河身長九百四十一丈挑土九千二百八十方用錢二千三百八十八千文

同治十年重濬橫瀝南出申浦北達吳淞計河身長六百七十七丈挑土二千六百二千方用錢六百九十千文

同治十年重濬小涑北過蒲滙以達吳淞南通竹岡以接申浦計河身長三百零五丈挑土一千五百七十七方用錢三百四十六千文以上蒲滙幹河橫瀝小涑大支河均於同治九年婁縣知縣金福會彙同上

邑尊朱鳳梯青邑尊錢寶傳協同彙濬東至肇家浜俱係三十五保各圖按田一畝捐錢八十文濟用

同治九年挑濬官紹塘計河身長七十丈計挑土方一萬二百六方用錢三百八十二千文均係四十保各圖業食佃力開挑業戶因先已捐過松河工費錢每畝三十文祇派每畝捐米二升挑至小官紹塘迤東河身七十丈仍歸華邑附二圖挑濬

同治十年挑濬白龍潭計工長一千二百餘丈土一萬二千餘方東新坊安樂二鄉八北十二等圖按田一畝捐米二升佃戶挑出土方近潭行鋪殷戶善堂作九股均挑其人烟稠密處各照門面承挑尚有土五

千七十五方由局開挑築壩戽水撈石等項共用錢一千八百餘千皆在松河捐內支給

同治十一年婁縣知縣汪坤厚挑浚城西市河自秀南橋口起大倉橋西止疏濬深通工程認真共丈尺土方用錢有案存縣

同治十二年挑濬秀野橋河至紅關帝廟後一帶河道三十五保馬家巷淤塞已久農田不能灌溉幾同實地

同治十三年重濬此河東達張家塘上海縣界出黃浦婁縣知縣汪坤厚上海縣知縣葉廷眷會同並濬計河身長一百六十二丈挑土一千一百四十三方係

三十五保十四十五十六圖按畝捐錢八十文用錢
四百餘千文汪公捐廉修造丁家石橋

光緒元年華婁兩邑合濬北俞塘計河身八百餘丈又
張涇廟塘河屬邑境計河身一千餘丈承挑圖分華
邑東外二地十二華十一圖婁邑三十七保十三十
四十六十八十九等圖業食佃力按畝派挑其街市
基地各照門面各佃承種田畝外塘派段開河裡騰
派錢以充厚水築壩等費其有不敷圖董津貼至業
食舊章無論外裡騰每畝出米三升

